

Na'a ke inu kava?

Taimi hifo mo fakakaukau...
'E fakatu'utāmaki nai 'eku faka'ulí ki he pāsesé mo e kakai kehé?

Kapau 'oku tāla'a, 'oua 'e faka'uli!



Ko e ngāhi fakamatala ki he:

- mahu'inga 'o e kavá 'i he anga fakafonuá
- ngāue 'aki 'o e kavá mo e nofo malú
- kavá mo e faka'uli me'alelé, 'a'ahi ki he:

www.aporosa.net/kava-and-driving



Na'e fa'u 'a e tohí ni mei he fakatotolo na'e fakahoko 'e Dr Apo Aporosa 'i he Te Huataki Waiora School of Health, 'i he 'Univēsiiti 'o Waikató, fakapa'anga 'e he Health Research Council of New Zealand.



THE UNIVERSITY OF
WAIKATO
Te Whare Wānanga o Waikato

Faitaá na'e fai 'e he tangata faitā 'iloa ko Todd M. Henry.
Hiki pea liliu ki he Lea Tonga, Faifekau Siosaia Sisitoutai.


KAVA & FAKA'ULI ME'ALELÉ

KO E 'UHINGÁ EÉ, KO E FAKA'APA'APA PĒ!



TRG
Transport Research Group





‘Oku ke ‘ilo ‘oku lava ke uesia ‘e he kava Tongá ho‘o faka‘uli me‘alelé?

‘Oku tupu fakautuutu ‘a e tokanga ‘a e Potungāue Polisí mo e Pule‘angá ki he uesia tamaki e faka‘ulí, fakatupu ‘e he kava Tongá. Kuo fakapa‘anga ai ‘e he Pule‘anga Niu Silá ha ngāhi fakatotolo fakaako lalahi ‘e tolu fekau‘aki mo e kavá.

Ko e hā ‘a e kava?

Ko e kavá ko e ‘akau tu‘u-fonua mo e ouau mahu‘inga ki he kakai Pasifikí, pea ‘oku ne pukepuke e molumalu ‘o e ngāhi katoanga, mo e fakafeohi ‘a e kakai ‘o e Moaná.

‘Oku hoko ‘a e inu kavá ko e to‘o ongosia, mo fakai‘ai‘ai e talanoa ‘oku fakalahi ‘iló. Ko ia, ‘oku ngāue ‘aki ai ‘a e kavá ‘e he ngāhi kulupu fakasōsia-lé, ‘o lau houa, pea a‘u pē ki he valenga ‘a e poó. ‘Oku ‘ikai ko e ‘olokaholo ‘a e kavá pea ‘oku ‘ikai te ne uesia ‘a e kau inu kavá ‘o hangē ko e ‘olokaholó. ‘Oku ‘ikai kaini kavea pe to‘inevea, ka ‘oku malu mo kau lelei ki he mo‘ui fakasinó.

Ko ia kuo manakoa ai ‘a e kavá ki he kakai kehe mei hotau fa‘ahingá. Kuo a‘u eni ‘a e inu kavá ki he ngāhi tapa kotoa ‘o e kolopé.

Ko e hā e ngāhi me‘a ‘oku ‘omi ‘e he kavá?

‘Oku ma‘u mei he ngāhi fakatotolo fakaakó ‘oku fakatuai‘i ‘e he kavá ‘a e fakakaukau mo e mafai faitu‘utu‘uni ‘a e tangatá. Ko ia, ‘oku kaunga tonu ‘a e kavá ki he tu‘unga malu ‘a e kakaí ‘i he hala pule‘angá.

Ko kinautolu ‘oku inu kava taufuá, ‘o hangē ko ia ‘oku fai ‘i Vanuatu mo e ngāhi feitu‘u ni‘ihi ‘i he fakahihifo ‘o e Pasifikí, ‘e vave ange ‘a e uesia tamaki kiate kinautolú. Pea ko Tonga mo Ha‘amoa mo e ngāhi feitu‘u ‘oku ‘ikai fu‘u taufua ai ‘a e kavá, ‘e tuai ange ‘a e uesia ‘e hokó.

Ka ‘oku na tatau pē, ‘oku lava ke fakatupu ‘e he inu kavá ‘a e faka‘uli fakatu‘utāmaki.

Ko e maumau lao ‘a e faka‘uli me‘alele hu‘akava‘iá

‘Oku fepaki mo e laó ke faka‘uli ha taha ‘i ha saliate mīsini ‘oku hu‘a-kava-‘ia. Ka ta‘ofi koe ‘e he polisí, ‘e lava ke puke koe, pe to‘o ho‘o laiseni faka‘ulí, pe ko e fakahū pilisone.

Ka ‘oku mahu‘inga ange, ke ‘ilo ko e faka‘uli hu‘akava‘iá ‘oku tu‘u-lavea-ngofua ai ‘ene mo‘uí, mo e kau pāsesé, mo kinautolu ‘i he hala pule‘angá. Ka pekia (pe lavea lahi) ha taha koe‘uhí ko ho‘o hu‘akava‘iá, ‘e lava pē ke tautea ngāue pōpula koe.

Ko e ‘uhingá eé, ko e faka‘apa‘apa pē

‘Oku fakamahu‘inga‘i ‘e he kakai Pasifikí ‘a e anga faka‘apa‘apá.

Pea ko e faka‘apa‘apá ‘a e mohenga ‘o e pukepuke fonuá.

‘Oku fakaivia ‘e he faka‘apa‘apá ‘etau ngāhi koloá ‘o kau ai ‘a e anga fakaTongá.

Ko ia ai, kapau na‘a ke toki ‘osi inu kava, ki‘i tu‘u hifo ‘o fakakaukau ki heni: ‘Oku ou toka‘i nai ‘eku kau pāsesé mo e tu‘unga malu ‘o e kakaí ‘i he hala pule‘angá?

‘E fakatu‘utāmaki nai ‘eku faka‘ulí kiate kinautolu?

***Kapau ‘oku tāla‘a,
‘oua ‘e faka‘uli!***